

Malaysia minta Indonesia bentuk kokus Parlimen bincang isu dua hala
The Malaysian Insider
27 Oktober , 2011

KUALA LUMPUR, 27 Okt — Yang Dipertua Dewan Negara Tan Sri Abu Zahar Ujang menyarankan agar Majlis Permesyuaratan Rakyat (MPR) Indonesia menubuhkan sebuah Majlis Kokus Parlimen Malaysia-Indonesia bagi membincangkan isu berbangkit mengenai hubungan kedua-dua negara.

Beliau berkata Malaysia telah menubuhkan Majlis Kokus Parlimen yang dianggotai 12 anggota Dewan Rakyat dan Dewan Negara.

Majlis seumpama itu katanya, berperanan sebagai platform untuk wakil rakyat berbincang menangani masalah yang timbul melibatkan kedua-dua negara.

“Elok juga kalau di pihak Indonesia ditubuhkan satu Majlis Kokus dari MPR Indonesia untuk sama-sama kita berbincang untuk mengeratkan lagi hubungan erat bangsa serumpun Malaysia dan Indonesia.

“Melaluinya, sudah pasti masalah berbangkit dapat dibincang dan dicari jalan penyelesaiannya, seterusnya menjadikan hubungan kedua-dua negara ini lebih baik, erat dan bergerak lebih progresif,” katanya pada majlis makan malam sempena Pertemuan Dinamik Serantau Malaysia-Indonesia di sini malam tadi.

Abu Zahar berkata cadangan itu sudah dikemukakan kepada Ketua Umum MPR Mohamad Taufiq Kiemas yang mengunjunginya di Parlimen pada 19 Oktober lalu.

Dipetik Bernama Online, beliau juga berharap isu persempadanan di Ambalat dapat diselesaikan segera atas semangat persaudaraan.

“Kita harapkan supaya isu ini dapat diselesaikan dengan semangat persaudaraan. Janganlah sampai kita terpaksa bawa isu ini untuk dibicarakan di peringkat Mahkamah Keadilan Antarabangsa (ICJ) dan mencari keputusan.

“Jika itu berlaku, sudah pasti ada pihak ketiga akan membuat keputusan demi ‘rumah tangga’ kedua-dua negara yang sentiasa aman dan harmoni sejak dahulu,” katanya.

The Malaysian Insider
Hakcipta © 2011 The Malaysian Insider
Source: <http://www.themalaysianinsider.com/bahasa/article/malaysia-minta-indonesia-bentuk-kokus-parlimen-bincang-isu-dua-hala/>